



BLPK anjur program kesiapsiagaan menghadapi banjir

Oleh: MOHD. RUZAINI HASHIM

Seramai 100 orang staf dan pelajar Universiti Malaysia PAHANG (UMP) menyertai Program Kesiapsiagaan Banjir 2015 anjuran Bahagian Latihan dan Pengembangan Kompetensi (BLPK) dan Jawatankuasa Kerja Sukarelawan Bencana dengan kerjasama Jabatan Pertahanan Awam (JPAM).

Program dijalankan serentak di kedua-dua kampus bertempat di Dewan Tun Teja, UMP Gambang dan Dewan Kuliah Utama, PBMSK, UMP Pekan pada 9 Disember 2015 yang lalu.

Pemangku Pendaftar, Abd. Rahman Haji Safie yang juga Pengerusi Jawatankuasa Bencana UMP berkata, semua pihak dalam universiti perlu bersedia untuk menghadapi musim banjir yang kini secara konsisten berlaku setiap tahun antara bulan Disember dan Januari.

"Masalah yang telah menjadi kelaziman perlu ditangani secara lazim dengan sentiasa berusaha untuk menambahbaik setiap aspek pengurusan. Malahan tindakan pencegahan perlu dilakukan lebih awal untuk meminimumkan kerugian, kerosakan, kehilangan harta benda dan sebagainya."

"Melalui program ini semua peserta akan diberikan input secara sistematis berkenaan tindakan persediaan, semasa banjir dan selepas banjir. Ianya akan membolehkan bencana banjir dapat ditangani dengan efektif dan efisyen," katanya.

Menurut beliau, setiap perkara dan tindakan berkenaan banjir perlu diuruskan secara teliti agar tidak berlaku kelemahan atau kecuaian yang boleh mengakibatkan permasalahan yang besar timbul. Contohnya sebagai tindakan pencegahan, para sukarelawan telah mula digerakkan ke sekolah-sekolah yang berisiko tinggi ditelenggami air banjir dengan tindakan dan gerak kerja memindahkan kerusi, meja dan lain-lain peralatan dan perabot ke tempat atau aras bangunan yang lebih tinggi bagi mengelakkan kerosakan.

"Hasil daripada tindakan tersebut, semua perabot dan peralatan yang berada di tingkat bawah bangunan sekolah telah dipindahkan dan dikosongkan. Sekiranya berlaku banjir maka tiada perabot atau peralatan yang rosak atau musnah. Tambahan pula sekarang ini

telah bermula cuti persekolahan yang mana tindakan tersebut tidak mengganggu proses pengajaran dan pembelajaran murid sekolah terbabit," katanya.

Sementara itu, Timbalan Pendaftar BLPK, Hazmin Aris berkata, pengajuran program ini dapat mendedahkan kepada peserta mengenai operasi pengurusan bencana khususnya banjir sebagai persediaan yang perlu dilakukan secara sistematis ketika berdepan dengan musibah banjir.

Katanya, program ini menekankan kepada aspek tindakan dan pelaksanaan semasa banjir berlaku mengikut undang-undang dan peraturan yang telah ditetapkan oleh pihak berkuasa yang berkaitan melalui penyelarasan oleh pihak Majlis Keselamatan Negara (MKN).

Dalam program ini Kapten Bersekutu (PA) Mohd Akram Abdul Razak turut berkongsi pengalaman menyertai misi kesukarelawanan semasa banjir melanda Pantai Timur beberapa tahun lalu.

Penganjuran program ini perlu diteruskan dalam meningkatkan usaha menguruskan masalah banjir melibatkan beberapa agensi seperti Polis DiRaja Malaysia, BOMBA, JPAM, Tentera dan sebagainya. Malahan inisiatif yang dilaksanakan oleh UMP ini juga dapat membantu agensi-agensi yang terlibat untuk memberikan perkhidmatan yang terbaik kepada mangsa-mangsa banjir.

Melalui program ini diharapkan para peserta dapat memahami peranan dan tanggungjawab yang perlu dilaksanakan bagi berhadapan dengan bencana banjir yang semakin tahun semakin memburuk selari dengan perubahan cuaca dunia.

Warga UMP perlu sentiasa bersedia untuk menghadapi dan menangi bencana banjir dengan efektif dan efisien agar pihak yang membantu dan pihak yang dibantu dapat melalui bencana ini dengan lancar serta dapat meminimumkan ketidakcepatan dan ketidakpuashatian.

Begitu juga dengan Pengerusi Jawatankuasa Kerja Sukarelawan, Mohd Raizalhilmy Mohd Rais berpendapat, selama ini kemungkinan sebahagian besar warga UMP meliputi staf dan belajar terlibat dengan aktiviti sukarelawan banjir namun kekhawatiran yang timbul adalah sejauhmana mereka memahami dan menghayati peranan dan tanggungjawab yang perlu dimainkan.

"Justeru, input yang diperoleh melalui program ini dapat membolehkan para sukarelawan lebih menghayati tugas yang perlu dilaksanakan," katanya.

Beliau menyeru seluruh warga universiti untuk sama-sama menyumbang tenaga menyertai sukarelawan universiti serta mendaftar sebagai sukarelawan JPAM untuk terus memberi sumbangan dan berbakti kepada negara.